

novel 
comel

RAHSIA JAMBUL CIKGU AMNAH



Ain Maisarah



Rahsia Jambul Kembang Cikgu Amnah

Hari Isnin datang lagi. Rutin utama hari Isnin tentunya upacara paling gilang gemilang yang tercatat kekal dalam kalendar persekolahan. Upacara apa lagi jika bukan....

PERHIMPUNAN!

Menderita dan mendera perasaan sungguh! Para pelajar sudahlah dikerah tenaga terpaksa bangun awal gosok gigi, mandi celup-celup pagi hari juga beratur di dewan sampai sakit kaki, tambah sakit hati bila telinga pun didera tak henti-henti.

Isnin itu ramai yang menguap-nguap. Wajah seorang-seorang pelajar Sekolah

Rahsia Jambul Kembang Cikgu Amnah

Menengah Sri Bangsar monyok macam cekodok basi. Tak bermaya langsung! Ramai berdoa sungguh hati, moga-moga perhimpunan minggu ini dibatalkan. Harap-harap akan ada mesyuarat tergempar semua guru. Namun doa mereka tidak dimakbulkan oleh Yang Esa.

Tepat pukul 7.30 pagi, wajah Puan Hajjah Zaiton yang penuh gaya keibuan kelihatan memasuki dewan Sekolah Menengah Sri Bangsar. Wajahnya sentiasa manis tersenyum. Pengetua itu memang disenangi semua warga Sri Bangsar kerana sikapnya. Mengekori di belakang Puan Hajjah Zaiton adalah guru yang paling ditakuti oleh segenap warga Sri Bangsar.

Guru itu tidak lain tidak bukan pastinya....
CIKGU AMNAH BIN AHMAD!

Cikgu yang seorang ini entah mengapa tak pernah nak senyum. Senyum pun setakat

senyum-senyum segaris yang takkan nampak gigi apatah lagi gusi. Almaklumlah, posisi jawatan yang dipegangnya adalah sebagai guru disiplin Sekolah Menengah Sri Bangsar sekaligus meletakkannya di tahap paling glamor lagi disebut-sebut sentiasa. Namun glamor Cikgu Amnah bukanlah terletak pada namanya, pangkatnya, atau suaranya..... tetapi glamor Cikgu Amnah terletak pada jambul terlebih kembangnya!

Sepanjang perhimpunan berlangsung, mata Cikgu Amnah ligat macam kamera CCTV yang punya fungsi bergerak. Sepuluh saat ke kanan, sepuluh saat ke kiri, sepuluh saat ke hadapan dan sepuluh saat lagi mencerun tajam memberi pandangan merbahaya ke arah para pelajar.

Memang ngeri lagi menakutkan!

Apabila sahaja nama Cikgu Amnah diumumkan bagi menyampaikan ucapan

Rahsia Jambul Kembang Cikgu Amnah

peringatan mingguan, wajahnya kekal serius. Khutbah Cikgu Amnah minggu ini berkisarkan tentang harta-harta rampasan yang semakin menimbun bergunung-ganang terkumpul di biliknya.

“Saya beri amaran terakhir. Semua jenis MP3, Discman dan Walkman yang dirampas tidak akan dipulangkan! Merayulah sampai keluar air mata darah sekalipun.....saya tetap tidak pulangkan!”

Suara serak-serak basah Cikgu Amnah yang teramat garang itu bergema kuat ke segenap ruang dewan. Sememangnya cikgu itu tersohor namanya dan dinobatkan sebagai guru paling garang di Sekolah Menengah Sri Bangsar. Anak dara tua yang menjangkau umur 48 tahun itu begitu sinonim dengan gaya memakai tudung jambul di depan. Aura kegarangannya begitu hebat hinggakan apabila sahaja terlihat kelibat jambul Cikgu

Amnah, para pelajar sudah pasti lari pecut bertempiaran!

Ucapan ngeri itu berlangsung agak lama kerana Cikgu Amnah punya bakat semulajadi bercakap tanpa sebarang had jua sempadan. Hanya pelajar-pelajar yang beratur di barisan hadapan masih mampu tunjuk muka alim-alim kucing serta berlagak baik. Manakala di bahagian di belakang, pelbagai telatah curi-curi bual mendominasi.

Tidak ketinggalan bergosip secara kecil-kecilan ialah kumpulan 'The Size 5'. Tiga ahlinya iaitu Hana, Huda dan Nita tak putus-putus main cuit-cuit. Sewaktu Cikgu Amnah beralih topik berleter mengenai kebersihan kawasan sekolah pula, Hana sempat mencuit Nita yang beratur dihadapannya.

"Jambul Cikgu Amnah hari ini nampak macam terlebih kembang."

Rahsia Jambul Kembang Cikgu Amnah

“Betul, macam mi maggi kembang semangkuk!” Huda turut tumpang sekaki mengata.

Nita sudah menggigil-gigil menahan ketawa. “Dia pakai syampu banyak sangat agaknya.”

“Taklah. Saya rasa dia terlebih pakai perapi rambut.” Hana pula menyatakan pendapatnya.

“Mungkin juga. Sekali pandang macam jambul ayam, kan?”

Huda disisi Hana sudah turut sama tergelak. Mata ketiga-tiga pelajar itu kini tertumpu sepenuhnya ke arah jambul guru disiplin yang garang itu. Tiga saat kemudian mereka tergelak sekali lagi. Kali ini lebih kuat sehinggakan pengawas yang menjaga barisan sudah menoleh dan menjeling tajam ke arah mereka.

Cepat-cepat Hana, Huda dan Nita menikus semula.

Itulah gelagat para pelajar. Tak boleh diam walau sesaat. Tentu ada sahaja aksi-aksi berbisik, cuit-mencuit dan berbual ketika perhimpunan berlangsung. Tetapi semua itu perlu dilakukan dengan berhati-hati agar tidak disedari oleh pengawas bertugas.

Majlis diteruskan lagi dengan ucapan guru bertugas minggu itu iaitu Encik Ghazali atau lebih dikenali dengan nama glamor ~Cikgu Ghazali yang miang sejak azali~

Cikgu Ghazali juga membebel panjang. Mungkin tak mahu kalah dengan Cikgu Amnah yang telah berjaya mencatat rekod ucapan selama 20 minit tanpa henti. Cikgu Ghazali lebih banyak menyentuh tentang kes ponteng kelas tambahan yang semakin berleluasa. Hampir 20 minit jugalah bebelannya itu berjaya mengundang

Rahsia Jambul Kembang Cikgu Amnah

keresahan dan kegelisahan para pelajar yang hampir tercabut lutut berdiri.

“Eh, *you girls* tengoklah budak-budak debab bertiga tu.” Mulut Huda terjuih menunjuk ke arah Umi, Edrina dan Widya.

“Mengapa dengan budak-budak gergasi tu?

“Yalah. Mereka bertiga mesti beratur di depan. Senyap dan berlakon baik. Konon-konon nak jadi murid contohlah tu!” Kata-kata Huda penuh cercaan.

Nita dan Hana kini tidak lagi menjadikan guru yang bercakap di atas pentas sebagai bahan gosip mereka. Kini pandangan mereka bertumpu kepada tiga debab sekawan.

“Jadi murid contoh? *Please!* Apa yang hendak dijadikan contoh? Ikut contoh badan mereka yang gemuk gedempol tu? Ikut jejak

langkah mereka bertiga yang kuat makan tu?”

Hana, Nita dan Huda kini makin rancak bergosip dan mengata. Langsung tidak mempedulikan ucapan guru bertugas di pentas. Tetapi kali ini perbualan mereka tidak berpanjangan bila dikejutkan dengan kelibat jambul Cikgu Amnah. Jambul yang terlebih kembang itu sudah betul-betul berada di tepi mereka!

“Sekali lagi saya dengar ada bunyi yang keluar dari mulut awak bertiga, saya takkan teragak-agak suruh kamu semua naik ke pentas!”

Terkulat-kulat Hana, Nita dan Huda dibuatnya! Tiba-tiba sahaja cikgu disiplin yang ditakuti itu sudah muncul di depan mata! Macam ada kuasa magis pula!

Tiga geng ‘*The Size 5*’ kini sudah menikus dan terpaksa berpura-pura menumpukan

Rahsia Jambul Kembang Cikgu Amnah

perhatian terhadap perjalanan agenda perhimpunan.

Cikgu Amnah menghadiahkan jelingan tahap laser ultraman sebelum berlalu pergi. Destinasinya mahu melihat-lihat pelajar-pelajar lelaki pula.

Hana, Nita dan Huda berjaya menutup mulut selama lima belas saat. Setelah memastikan jambul terlebih kembang Cikgu Amnah semakin menjauh dan tidak lagi mendatangkan sebarang kesan-kesan bahaya kepada mereka, tiga pelajar itu berbisik-bisik kembali.

“WAH! Saya dapat lihat dari pandangan dekat jambul Cikgu Amnah!” Huda dengan teruja memberitahu semua.

“Saya pun sama!” Nita juga menyeringai kegembiraan.

Hanya Hana seorang yang masam muka tak puas hati. Dia tidak dapat menyaksikan detik-detik eksklusif melihat jambul Cikgu Amnah dari jarak dekat. “Melepas peluang saya nak tengok jambul Cikgu Amnah!” Hana muncung tak puas hati.

Huda dan Nita berbalas pandang sesama sendiri. Hana tunduk ketakutan sebaik sahaja menyedari Cikgu Amnah sudah berdiri di sisinya. Itu sebabnya Hana tak nampak jambul Cikgu Amnah! Siapa suruh jadi penakut sangat?

“Jambul Cikgu Amnah nampak kembang semacam....tapi saya peliklah. Saya syak jambulnya itu sedikit *sesuatu*.” Nita kembali membincangkan topik jambul Cikgu Amnah.

“*Sesuatu?* Apa yang *sesuatu?* Saya tak faham!” Hana semakin mahu tahu.

Nita menggaru-garu kepalanya yang tak gatal. Dia sendiri tidak dapat menjelaskan

Rahsia Jambul Kembang Cikgu Amnah

apa yang dirasakannya sebagai *sesuatu* itu. “*Sesuatu* yang sangat pelik.” Nita menjelaskan.

Huda dan Hana terkebil-kebil mendengar penjelasan Nita yang langsung tidak jelas itu. Apa yang pelik tentang jambul Cikgu Amnah? Jambulnya memang terlebih kembang....tapi tidaklah termasuk kategori pelik.

Berkerut-kerut wajah Nita berfikir. Dia cuba membayangkan kembali imej jambul Cikgu Amnah. Seketika dia terdiam sendiri. “Hah! Saya tahu jawapannya! Jambul Cikgu Amnah nampak pelik sebab ianya terlebih keras.” Nita memetik jari sebaik sahaja dapat mengungkap persoalan yang bermain di fikiran.

“Betul cakap awak. Saya pun baru tersedar, jambul Cikgu Amnah nampak keras dan kaku.” Huda menyokong kata-kata Nita.

Ketiga-tiga rakan itu kekal bergosip, sekali-sekala memerhati juga kiri dan kanan. Bimbang sekiranya ada pengawas meronda yang dapat mengesan aktiviti curi-curi gosip mereka.

“Jambul Cikgu Amnah keras, kaku dan kekal terletak. Itu semua hasil pemerhatian kita. Tapi apa pula kesimpulannya?” Huda menggaru-garu dagunya yang tak berjerawat.

“Apa kata kita korek rahsia sebenar jambul Cikgu Amnah? Kita boleh temuduga Mak cik Sharepah.” Huda memberi cadangan.

“Mak cik Sharepah? Mak cik kantin kita tu?” Nita sudah buat muka tak puas hati. Pada Nita cadangan Huda tak relevan langsung! Apa kaitan Mak cik Sharepah dengan jambul kembang Cikgu Amnah?? *Non related whatsoever!*

Rahsia Jambul Kembang Cikgu Amnah

“Mak cik Sharepah baik dengan semua cikgu di Sri Bangsar. Tentu dia tahu juga serba sedikit kisah peribadi atau gosip panas cikgu-cikgu Sri Bangsar.” Huda menerangkan rasional cadangannya kepada semua.

Hana dan Nita makin melebar senyuman bilamana mendengar cadangan bernas yang dikemukakan oleh Huda. “Baiklah kawan-kawan semua, waktu rehat nanti kita akan TERJAH! Mak cik Sharepah akan disoal-siasat sehabis mungkin!” Hana begitu bersemangat sekali mahu mengungkap rahsia. Lagaknya saling tak tumpah macam wartawan hiburan Melodi!



Tiga sekawan itu memerhati Mak cik Sharepah dari jauh. Mak cik Sharepah adalah pemilik kantin Sekolah Menengah Sri Bangsar. Sibuk wanita berumur sekitar 40

tahun itu menyusun kuih-muih di deretan meja hadapan kantin. Hana memerhati jam di tangannya. Ada sepuluh minit lagi sebelum loceng berbunyi. Mereka harus bergerak pantas lagi tangkas.

“Apa yang kita tunggu? Itu Mak cik Sharepah. Cepatlah kita tanya apa yang patut!” Huda sudah mendahului. Namun Hana cepat-cepat menarik lengan baju Huda, mahu menghentikan langkah kawannya itu.

“Huda! Takkanlah kita nak tanya *straight forward* pada Mak cik Sharepah! Mesti dia pelik! Tak ada angin, tak ada ribut.....tiba-tiba sibuk nak bertanya itu ini!” Hana cepat-cepat memberi peringatan.

Nita mengganggu tanda setuju. “Betul kata Hana. Selama ini kita tak pernah beli kuih-muih di kantin. Kita juga bukan jenis kuat makan macam budak-budak debab ‘Kelab Saiz XL’ tu.”

Rahsia Jambul Kembang Cikgu Amnah

“Kita perlu ada strategi.” Hana memberi kesimpulan perbincangan.

Dengan kesimpulan yang dibuat maka Hana, Nita dan Huda pun bertafakur seketika. Lama mereka berfikir mahu merancang strategi terbaik mendekati Mak cik Sharepah.

“I’ve got it!” Hana tersenyum lebar.

“Bagaimana caranya?” Nita laju bertanya.

“Ikut sahaja saya. *Let me do all the talking.*”

Hana sempat berpesan sebelum melangkah menuju ke arah Mak cik Sharepah. Ketiga-tiga pelajar tinggi lampai itu semakin mendekati kaunter jualan kuih-muih di kantin. Jawapan kepada rahsia jambul terlebih kembang Cikgu Amnah juga semakin dekat...



“Mak cik....kami nak tanya, boleh tak kami buat tempahan kuih di sini?” Hana memulakan tugas sebagai perisik. Gaya lakonannya meyakinkan. Nita dan Huda pula sentiasa setia menemani.

Mak cik Sharepah mengangkat muka. Wajahnya kelihatan sedikit penat tetapi masih mampu melemparkan senyuman mesra. “Boleh. Nak buat tempahan bagi majlis apa?”

Hana dengan muka semanis gula memantapkan lagi lakonannya. “Majlis jamuan persatuan. Kami nak tempah 100 biji kuih.”

“Bila nak kuih-muih tu?”

“Hmm....esok petang boleh?” Hana cuba mempamerkan reaksi muka berminat.

Rahsia Jambul Kembang Cikgu Amnah

Mak cik Sharepah kelihatan berfikir sejenak sebelum mengangguk tanda setuju. “Nak kuih apa? Mak cik sedia terima tempahan semua jenis kuih-muih. Nak jenis yang bergoreng atau yang dalam loyang?”

Hana memandang ke arah Nita dan Huda. Dia dilahirkan punya lidah antarabangsa. Jarang benar makan kuih-muih tradisional. Nama-nama kuih pun tak lulus nak menghafal!

Apabila melihat Hana lama terdiam, Nita laju sahaja mencelah. “Apa kata kami jumpa semula makcik lepas waktu sekolah petang ini. Nanti kami senaraikan jenis kuih yang mahu ditempah juga kuantitinya.”

Mak cik Sharepah mengangguk tanda setuju. Dia mencatatkan tempahan terbaru itu di dalam buku notanya. “Semuanya RM20. Nak bayar sekarang atau esok?”

Hana cepat-cepat menyeluk poket baju lalu mengeluarkan dompet berjenama ESPRIT. Dua keping duit RM10 dihulur kepada Mak cik Sharepah. “Ini duitnya. Petang ini kami datang lagi ya?” Senyuman palsu semanis gula itu dihadiahkan tiga sekawan yang pura-pura jadi gadis paling bersopan-santun dalam dunia sebelum berlalu pergi.

Menjauhi kantin.....Hana, Nita dan Huda bersorak riang! Strategi pertama sudah berjaya, misi mengorek rahsia bakal menanti!



Loceng berbunyi dengan panjang lagi nyaring menandakan waktu persekolahan sudah tamat. Sebaik sahaja terlepas daripada cengkaman Cikgu Haizi....Hana, Nita dan Huda segera menuju ke kantin. Mereka

Rahsia Jambul Kembang Cikgu Amnah

membawa bersama sehelai kertas pesanan yang digenggam erat.

Jenis kuih	Kuantiti
Popiah	25
Karipap	25
Kuih Tepung Talam	25
Kuih Lapis	25

Hana, Nita dan Huda berjaya mendapatkan senarai nama kuih-muih itu daripada pertolongan rakan-rakan sekelas. Kalau nak diharapkan pengetahuan am tiga sekawan itu tentang nama kuih-muih tradisional, memang tak lulus dan pasti dapat gred F!

“Itu Mak cik Sharepah.” Muncung mulut Huda dengan efisien sekali menunjuk ke arah sasaran. Langkah tiga sekawan semakin laju mendekati.

“Mak cik, ini senarai kuih-muih yang mahu ditempah.” Penuh sopan-santun Hana membuka bicara. Dihulurkan kertas pesanan dengan penuh lemah gemalai. Mak cik Sharepah tersenyum menerima tempahan. “Esok pukul berapa nak ambil kuih?”

Hana buat-buat berkerut dahi konon-konon sedang berfikir. “Esok jamuan mula pukul 2.00 petang. *Hmm...saya* terlupa pula, pukul berapa kita nak jemput Cikgu Amnah?”

“Pukul 2.30 petang.” Nita cepat-cepat mengingatkan.

“Oh! Cikgu Amnah hadir sama majlis kamu esok?” Mak cik Sharepah bertanya.

Tatkala itu Hana, Huda dan Nita sudah bersorak riang dalam hati. Nampaknya sasaran sudah masuk perangkap. Mak cik Sharepah sudah mula membuka topik bual bicara berkenaan Cikgu Amnah!

Rahsia Jambul Kembang Cikgu Amnah



Hampir satu jam tiga sekawan itu menjalankan temuduga mengorek rahsia. Mujur juga Mak cik Sharepah jenis kuat bergosip! Maka dengan senang hati segala cerita lampau juga sejarah silam mengenai Cikgu Amnah dikongsi bersama. Kisah 20 tahun lalu dibuka kembali lembarannya.....

Dahulu Cikgu Amnah lebih dikenali sebagai guru subjek sains. Selesai pengajian di universiti, dia terus ditugaskan mengajar di sekolah yang boleh dikatakan berlokasi di kawasan bandar. Nama sekolah tersebut adalah Sekolah Menengah Sri Bangsar.

Cikgu Amnah popular di kalangan pelajar sebagai guru sains yang *sporting* dan jenis cepat mesra. Dia juga guru muda yang amat disenangi. Tambah-tambah pula Cikgu Amnah jenis selamba turun padang

sama-sama mencari katak, tikus dan lipas sebagai bahan eksperimen projek sains. Itu membuatkan Cikgu Amnah jadi kesayangan semua!

Satu insiden merubah segalanya. Insiden itu menyebabkan Cikgu Amnah mengalami transformasi yang dramatik. Hana, Nita dan Huda melopong besar mendengar cerita itu.



“Cikgu, boleh tolong kami?” Kuat sekali suara sekumpulan pelajar lelaki yang duduk di meja paling belakang dalam makmal sains melaung memanggil Cikgu Amnah.

“Cikgu, cepatlah datang sini. Penunu bunsen meja kami tak boleh nak menyala.” Mereka mengadu lagi. Cikgu Amnah yang ketika itu sedang menunjuk ajar pelajar perempuan di meja pertama cepat mengangkat tangan.

“Sekejap. Satu minit lagi cikgu datang.”

Cikgu Amnah menerangkan proses dan kaedah eksperimen kepada pelajar-pelajarnya di meja pertama. Setelah pasti semua faham dengan penjelasannya, dia berlalu pergi menuju ke meja paling belakang pula.

Pelajar lelaki selalunya lebih pandai membuat bising, mencipta onar dan mewujudkan masalah. Jadi bila sesekali mereka menunjukkan minat mahu belajar, Cikgu Amnah teruja mahu membantu.

“Apa masalahnya? Apa yang kamu semua tak faham?” Cikgu Amnah memandang sekilas ke arah enam pelajar lelaki yang mengelilinginya.

Seorang pelajar bernama Azmi tampil memberitahu masalah. “Cikgu, penunu bunsen di meja kami tak berfungsi. Kami cuba nyalakan tapi tak hidup-hidup.”

Cikgu Amnah beralih mendekati radas makmal sains yang dipanggil penunu bunsen. “Tolong ambilkan saya pemetik api tu.”

Azmi segera menyerahkan pemetik api. Lama Cikgu Amnah cuba membuka suis getah pada penunu bunsen tersebut. Dia kemudian menyalakan pemetik api mendekati muncung penunu bunsen. Tiada api yang menyala.

“*Hmm...* mungkin gas dah habis.” Cikgu Amnah membuat telahan sendiri.

Digoncang-goncangnya penunu bunsen berwarna biru itu sekuat hati. Masih kedengaran ada cecair berbaki di dalam. Itu bermakna telahan pertamanya bahawa gas dalam bekas penunu bunsen itu sudah habis adalah tidak tepat.

Cikgu Amnah menggoncangkan berkali-kali penunu bunsen itu sebelum membuka kembali suis getah. Dibiarkan suis itu terbuka

Rahsia Jambul Kembang Cikgu Amnah

seketika sebelum menyalakan kembali pemetik api.

Lima saat seterusnya.... makmal itu dikejutkan dengan bunyi letupan kecil, diikuti jeritan nyaring Cikgu Amnah!



Satu kelas terpaksa tidak memberi reaksi. Cikgu Amnah berseorangan terkial-kial memadam api yang menyala membakar jambul rambutnya. Tiada yang membantu, tiada yang menolong.

Kedengaran pelajar lelaki di meja belakang sudah terkekek-kekek bergelak ketawa. Mereka tidak dapat menahan geli hati bila mana guru itu terlompat-lompat, terjerit-jerit dan menepuk-nepuk dahi sendiri.

Cikgu Amnah akhirnya kembali tenang setelah yakin api yang membakar jambulnya sudah terpadam. Dia menarik nafas dalam-dalam. Matanya merenung tajam ke arah pelajar-pelajar lelaki yang masih lagi tidak berhenti ketawa.

“Apa yang kelakar sangat?” Cikgu Amnah masih merenung ke arah sekumpulan pelajar lelaki yang tersengih-sengih macam kerang busuk. Suaranya yang selama ini sentiasa lemah lembut, tiba-tiba bertukar serius.

Azmi yang terkenal sebagai budak lelaki paling nakal dengan selamba tampil ke hadapan. Senyuman masih tidak lekang dari bibirnya. “Cikgu...kami ketawa sebab kelakar sangat tengok cikgu terlompat-lompat. Lagipun cikgu patut tengok cermin sekarang....jambul cikgu teruk hangus terbakar.”

Rahsia Jambul Kembang Cikgu Amnah

Kata-kata Azmi disambut dengan deraian ketawa satu kelas. Cikgu Amnah sudah meraba-raba jambul di dahinya. Terasa keras kesan terbakar. Dia sudah berlari keluar dari makmal. Mahu segera mencari cermin terdekat dan melihat sendiri kerosakan yang telah berlaku!

Deraian ketawa yang tidak berpenghujung itu terus-terusan terngiang-ngiang di telinganya.



Seminggu Cikgu Amnah bercuti. Semua pelajar di bawah bimbingan Cikgu Amnah jadi tertanya-tanya. Kemanakah gerakan Cikgu Amnah menghilang?

~Cikgu Amnah terkena demam terkejut agaknya.~

~Cikgu Amnah jalani rawatan rambut.~

~Cikgu Amnah tak sembuh lagi dari rasa malu.~

~Cikgu Amnah sedang berusaha mohon pindah mengajar ke sekolah lain.

Bermacam spekulasi yang diperdebatkan. Semua warga Sri Bangsar ternanti-nanti kehadiran Cikgu Amnah. Adakah jambul terbakarnya dapat diperbaiki? Adakah Cikgu Amnah akan bertudung demi menutup rambut rosaknya? Adakah Cikgu Amnah akan mengenakan rambut palsu?

Segalanya terjawab bila mana Cikgu Amnah kembali. Kembalinya Cikgu Amnah tidak lagi seperti dulu. Kembalinya Cikgu Amnah dengan personaliti baru.



“SENYAP SEMUA! Sekali lagi saya dengar sebarang bunyi, semua saya hukum berdiri atas meja!”

Jeritan garang itu sengeri halilintar. Wajahnya serius. Tiada lagi senyuman. Tiada lagi gelak ketawa. Tiada lagi gurau mesra.

Itu personaliti baru Cikgu Amnah. Dia bukan lagi guru muda yang *sporting*, selamba dan boleh dipersendakan. Dia tidak akan sesekali membiarkan kepalanya dipijak-pijak. Dia bukan lagi guru muda yang boleh ditertawakan.

Cikgu Amnah sudah hebat bertransformasi sejak dari kejadian jambulnya terbakar! Sakit hatinya ditertawakan pelajar sendiri tidak pernah hilang dari ingatan. Dia tidak akan sesekali membiarkan para pelajar mempermainkannya sesuka hati!

Sejak itu Cikgu Amnah telah berubah menjadi guru paling garang, paling masam dan paling menakutkan.

Jika personalitinya berubah sejak tragedi itu, penampilannya juga bertukar rupa. Dahulu Cikgu Amnah melepaskan rambutnya yang separas bahu jadi tontonan semua.

Namun setelah seminggu menghilang, Cikgu Amnah kembali dengan imej baru. Imej bertudung tapi jambulnya kembang ke depan. Mungkin mahu membuktikan jambulnya yang terbakar sudah sembuh sepenuhnya.

“Begitulah kisahnya.” Mak cik Sharepah selesai bercerita.

Hana, Nita dan Huda tidak mampu memberi sebarang reaksi setelah mendengar kisah sebenar di sebalik kejadian jambul kembang terlebih keras milik Cikgu Amnah.

Rahsia Jambul Kembang Cikgu Amnah

“Sehingga sekarang tak ada siapa yang tahu sama ada jambul Cikgu Amnah itu jambul palsu atau jambul yang terbakar 20 tahun dahulu.” Mak cik Sharepah akhirnya menutup cerita. Kini Hana, Nita dan Huda sudah tahu kisah sebenar di sebalik jambul terlebih kembang guru disiplin Sekolah Menengah Sri Bangsar iaitu Cikgu Amnah. Misteri sudah terungkai. Persoalan sudah terjawab!

~ TAMAT ~

MAHU DAPATKAN BUKU BLINK?



**SILA WHATSAPP
NOMBOR TELEFON INI :
0193365205
(WHATSAPP SAHAJA)**